

DAVANT EUSKALTZAIN ZUBEROTARRAK ARTURO KANPION IZAN ZUEN SOLASGAI SARRERA EKITALDIAN

Ikastaroak hasi dira Miarritzen

■ Miarritzeko Ostalaritza Lizeoan 150 bat ikaslek hasi dituzte udako ikastaroak atzo, eta heldu den ostirala arte iraunen dute. Hautu anitz eskaintzen dute ikastaldiek. Aurtengo helburua mugak gainditzea dela adierazi zuen UEUko zuzendariak.

Arantxa Hirigoién / Miarritze

AURTEN 26. aldikotz antolatutako diren Udako Euskal Unibertsitateko ikastaroak atzo ireki zituzten ateak. Hiru aste iraunen dute eta bi lekutan egingen dira, Iruñean eta Miarritzen hain zuzen ere. Joan diren urteetan bezala aurtengo ere Udako Euskal Unibertsitatea mugaz bi aldeetan antolatuta da. «Bi lekutan antolatzeak baditu bere arrazoiak. Gure helburuetariko bat, Iparraldeko eta Hegoaldeko mugen gainditzea da», azaldu zuen Mikel Aizpuru UEUko zuzendariak Miarritzeko sarrera ekitaldian. «Ikastaroak euskaldun guzietarako zabalduak dira. Ez dira hegoaldeko edo iparraldeko jendeari begira antolatutakoak. Hori da UEU hartzen ari den bidea, horrek ekartzen dituen arrisku eta arazoekin», segitu zuen.

Atzoko sarrera ekitaldian Jean-Louis Davant euskaltzainak hartu zuen hitza, Arturo Kanpion euskalariak mintzatzeko. Gai hau espreski hautatua izan da Kanpion batasun egilea izan baitzen, hau da, Iparraldea eta Hegoaldea batzeko nahikeria baitzuen. Euskaltzainaren usteetan, *Zazpiak Bat* lemaaren asmatzaileetarikoa bat izan zen idazle eta historialari nafarra.

Hitzaldian zehar Davantek Arturo Kanpion ikuspegi desberdinetatik jorratu zuen. Haren bizitzatik hasi eta hainbat urtetan barna burutu zituen lanak eta obrak aipatu zituen. «Kanpionek bi oinarri nagusi zituen: historia eta euskara», adierazi zuen Davantek. Gaztelaniaz idazteko



Ikasleak atzo Miarritzeko ikastaroetan parte hartzeko izena ematen.

BOB EDMÉ

joera baldin bazuen ere, euskarekiko atxikimendu handia izan zuen beti. Euskaraz bi lan nagusi ateratu zituen: *Orreaga* balada alde batetik, eta euskal gramatika bat ere idatzi zuen.

Euskaltzaindiaren sortzean parte hartu zuen Kanpionek. Euskara batuari begira uzkur zegoen, beldur baitzen euskalki artifizial bat sortuko zela. «Bere obraz anitz dakigu, gizonak haatik gutiagok», erran zuen euskaltzainak. «Guretzat bide erakasle gelditzen da Kanpion. Bide urratzaile izan da» erranez bukatu zuen sarrerahitzaldia.

Hautu zabala • Sarrera ekitaldiaren ondoren, arratsaldean hasi ziren ikastaroak. Aurtengo berrikuntza franko agertu da. Leku aldaketaz gain, Baionatik Miarritzera, mota desberdinetako ikasgaiak agertzen dira egitarauan. Azken berrien arabera 150 bat ikaslek eman dute izena Miarritzeko Ostalaritza Lizeoan heldu den ostirala arte iraganen diren ikastaldietan parte hartzeko.

Sei sail nagusitan banatuak dira ikastaroak: Historia, Psikologia, Soziolinguistika, Fisika, Kimika eta Natur Zientziak. Ikasgai gehientsuenak atzo berean

hasi ziren. Psikologian, adibidez, *Laztana*, aska gaitzeen gaiaren inguruko ikastaroa hasi zen Hirusta, Sexu Hezkuntzako iker-tzaileen kolektiboaren eskutik. Sail berean, *Programazio neuro-linguistikoa* izeneko saioari hasiera eman zitzaion. Soziolinguistikan eta zientzietan ere gaiak jorratzen hasi ziren atzo bertan. Historia sailean *Historia eta fikzioa: Karlomagno Euskal Herrian VIII-IX mendetan* izenburupean segitzen dute ikastaroa. Gaurko, ateraldi bat antolatuta dute Ibañetarraino, Xipri Alberbidek gidaturik. X

Diaspora berria eraikitzeke Jaurilaritzaren saioak aztergai

■ *Aurreikusia zegoen bezala eman zitzaion hasiera euskal kongresuari Renoko Riverboat hotelean*

Migel Anjel Elustondo / Reno

RIVERBOAT hoteleko Casinoak ohiko itxura zuen, goizeko 08:00ak zirenean, eta ez zen berririk antzematen. Makina txanponjaleetan ari zen jendea. Hirugarren oinean, berri, beste-lakoa zen giroa. Bilera aretoaren atariak irakasleak ziren nagusi, agurrak eta ongi etorri hotsak.

08:30etan, berri, irekiera ekitaldia hasi zen. Richard S. Jarvis, Nevadako Unibertsitateko ordezkaria, Jeff Griffin, Renoko alkatea, Josune Ariztondo —Kultura Sailaren izenean—, Iñaki Agirre —Kanpo Harremanetarako Idazkaritzatik—, Carmelo Urza —EEBBetako ikasleak kanpoko unibertsitateetara zuzentzen dituen USAC bulegoko zuzenda-

ria—, eta William A. Douglass —Renoko Euskal Mintegiaren koordinatzailea— ziren agur egile.

Eta agurrak egin eta berehala ekin zioten hizlariak. Alfonso Perez Agote, JuanCovarrubias, Andoni Alonso, Baleren Bakalkoa eta William Douglass izan ziren lehenengo hizlariak.

Diaspora berria eraiki nahi •

William A. Douglass hitzaldia izan zen goizeko saiorik nabarmenetakoa. Joan den 50 urte honetan euskaldunek EEBBetara etortzeari utzi diotela esanez ekin zion Douglass. Horrekin batera, diaspora berria eraikitzeke Euskal Gobernuaren saioak izan zituen hitzaldiaren gai. Douglassen arabera, bi helburu dituzte Jaurilaritzaren saioak:

diasporan euskalduntasunari eustea, eta Euskal Herriko euskaldunen eta diasporakoen artean loturak sendotzea, gerora ekonomia eta politika harremanak bideratzeko.

Bestalde, diasporak Euskal Herriaz duen irudia egiazkoago izan liteke egun. Sevillako Expo-pabilioiak, Dalai Lamaren bisitak, Guggenheim Museoak, UNESCOrekin hitzarmenak... Jaurilaritzaren eta diasporaren arteko harremanak azkartzen laguntzen dute. Lehendakariak hainbat herrialdetara egin ohi dituen bisitak ere —estatuburu gisara, ia-ia—, eta ekonomia harremanak bideratzeko osatutako institutu eta fundazioak ere diaspora justifikatzen dute.

Behin ere baino lan gehiago

egin da eta inoiz baino oparoago dator etorkizuna. Douglassak dakienaz, ez dago herrikeria bere diaspora sendotzeko tamainako lanik hartu duenik. Hala ere, pesimista izateko arrazoiak ere aipatu zituen: Eusko Jaurilaritza hiru lurraldetako gobernu, eta ez Euskal Herri osokoa, dugu lehena. Bigarrena, Europako Batasuna da, ez baitago jakiterik horrek zer ondorio ekarriko dion diasporari. Hirugarrena, denbora bera: izan ere, zenbait adituren arabera, denbora joan arau Ama Lurreko bertsio bat —hibridoa— baino ez baita, geratzen diasporan. Hortaz, zein Euskal Herri elikatuko du kanpoko zein Euskal Herri? Alegia, inork inork elikatzen eta laguntzen badu. Horra William Douglassen galdera. X

Lanbide Heziketako Euskal Planaren berri emateko, Lanbidez kanpaina antolatu dute

■ *Telebistako iragarkien, liburuen eta Interneten bitartez emango dute planaren berri*

Ainhua Oiartzabal / Donostia

EUSKAL Autonomia Erkidegoko (EAE) Hekuntza sailburu Inaxio Oliverik atzo aurkeztu zuen Lanbide Heziketako Euskal Planaren berri emango duen Lanbidez informazio kanpaina, Javier Agirre Lanbide Heziketako Euskal Kontseiluko kidearekin batera.

Sailburuaren esanetan, planak EAEko etorkizunean izango duen garrantzia azpimarratzeko antolatu dute informazio kanpaina. Lanbide Heziketarako plan hori instituzio, enpresari, elkarrekin, sindikatu eta ikastetxeen artean adostu dute: «Hemen egin diren ekintza politiko-administratiboen artean kontsentsu gehien lortu duena da, ziur aski». Aipatu planak Lanbide Heziketako hiru modalitateak bakar batean biltzen ditu, eta bitartekoak berriak ezartzen ditu formazioa enpresen beharretara egokitzeko. Finean, planaren bidez enpresen behar berriak erantzuteko bitartekoak jarriko dituzte Lanbide Heziketaren.

Datorren irailean jarriko dute martxan duela urtebete inguru onarturiko plana. Hala ere, bi urte igaroko dira plan osoa indarrean jarri arte. Urtebetean plana diseinatzeko eta aurrera eramateko bitartekoak jartzen ari dira.

Lanbide Heziketako Euskal Kontseilua ere aipatu elkarrekin osatzen dute eta kontseilua arduratu da Lanbidez informazio kanpaina antolatzeko. Kanpainaren helburua gizartea planaren garrantziaz jabetaraztea da, eta ekintza ugari egingo dituzte hori lortzeko. Esaterako, iragarkiak egingo dituzte telebista eta egunkarietan. Gainera, planaren berri ematen duen liburua bat kaleratu dute. Internet bidez ere zabalduko dute informazioa.

«Lanbide Heziketa ez da maila baxuko heziketa; Lanbide Heziketa erabakigarria eta beharrezkoa da euskal gizartearentzat», adierazi zuen Inaxio Oliveri hezkuntza sailburuak. Lanbide Heziketan, arlo teknologikoari dagokionean adibidez, puntaren puntako formazioa eskaintzen dutela esan zuen Oliveri, «eta hori oso garrantzitsua da industriaren garrantzietatik». Beraz, gizartearen Lanbide Heziketan egingo dituzten bai aldaketak bai bere garrantzia azaltzea dira Lanbidez informazio kanpainaren asmoak. X